

# O LE SULU SAMOA



EKALESIA FAAPOTOPOTOGA KERISIANO SAMOA  
O LE NUSIPEPA FAA-LE-LOTU NA FAAVAEINA I LE T.A. 1839



FAAVAEINA 1839

O LE SULU SAMOA

OKETOPA 2020

email: sulusamoa@cccs.org.ws -Main Office: Ph. 24414, Ext 30 - website: www.cccs.org.ws

## FONO TELE FAAFUASE'I 2020



### PENISIONE TAITAIFONO KOMITI AU TOEAINA



Tua: Misipalauni Faatau FT, Afioga Ao Mamalu o le Malo Tuimalealiifano Vaaletoa Sualauvi II AF, Tausunu Leifi, Teki Uilelea, Savaliga Time, Susana Iosia, Maima Matautia, Sapini Pasia, Tunumoso S.Iosia FT, Iosefa A. Uilelea FT, Asotasi Gu Time FT. Luma: Lupe Monika & Tavita Anesone Faifeau Toeaina Penisione 2020.

# FAASINO UPU

1. O LE LAUGA	2
2. FONOTELE FAAFUASE'I	4
3. PENISIONE TAITAFONO KAT	6
4. FETU'UTU'UNA'IMUNIAO	8
5. MEA 'AIE TATAU MA LE ASO	10
6. P'UGASU'EGA ULUFALE MALUA	14
7. SOLO - LOTU TAMAITI	14
8. O E UAFAI I LAGI FOLAUGA	14

## O LE LAUGA

**Tusi Faitau:** Feagaiga Tuai - Isaia 62: 1 – 12.  
Feagaiga Fou: II Korinito 11: 24 – 29

**Matua:** Isaia 62: *"Ou te lē faalologo auā o Siona, ou te lē mapu foi auā o Ierusalem, se'ia alu atu lana amiotonu e pei o se mea pupula, ma lona olataga e pei o le sulu ua mumū"*.

**Manatu Autu:** Finau Pea, Ia Malo!!

O le ola finau, po o le ola finafinai, o se olaga lava e finagalo ai le Atua. O se olaga e saili le manumalo i totonu o faigata. Po o le olaga e saili le manuia i taimi o puapuaga ma tiga. O le upu moni, e lē iloa se ola finau i totonu o ni mea faigofie. E pei a o le gagana masani a le atunuu, "E leai se mea lelei e maua ma le filemu".

A lē filigā ma lē tauivi, a lē onosai ma tinoū, a lē finau ae faalogologotiga, e lē tau lau o le faamoemoe.

Lea la e i ai le faitau lea a le perofeta ua fai ma matua; *"Ou te lē faalologo auā o Siona, ou te lē mapu foi auā o Ierusalem, seia alu atu lana amiotonu e pei o se mea pupula, ma lona olataga e pei o le sulu ua mumū"*.

O faanaunaga ia o loto o tagata fia saoloto, le nuu o le Atua, a o nofo pologa i Papelonia i le tele o tausaga. Ae ua oo mai i ona po e faataunuina ai poloaiga a le Atua ma ana folafolaga. Lea o lo o faapea mai, "Israelu, e i ai lo outou aso, e i ai foi lo outou taimi, tou te toe foi ai i le nuu ua filifilia ai outou e le Atua, e fai ma o outou tofi". Lea la ua oo ina toe foi le nuu o le Atua. E faapea le tala, o nisi ua matutua, sa latou tu'ua le aai o Ierusalem a o pepe meamea. O nisi ua lē toe foi mai, ua maliliu ai lava i Papelonia. A o le vaai a tagata vā'ai ma le faitau a toeiina, sa faalogo i tala o Ierusalem. Ua lē taitāi ona tutusa mea na vaai i ai o latou mata, ma mea na

faalogo i ai o latou taliga, ma le vaaiga ua taunuu i ai – ua matuā faatafuna'iina le Ierusalem.

Ae peitai, sa i ai pea lo latou faamoemoe, auā ua uma ona folafola mai e le Atua i o latou matua, "E i ai lo latou taeao, e i ai foi lo latou aso, e i ai foi lo latou taimi. Peitai o lea taimi, e lē o se taimi e faia e le tagata, a o le taimi e pule mai e le Atua lava ia."

O le mataupu la leni a le Tusi a le Perofeta o Isaia, o lo o fa'aalia ai le naunautaga o le nuu, ina faia ia e le Atua le mea sa folafolaina mai. Lea la e i ai upu o le matua, *"Matou te lē faalologo auā o Siona, matou te lē mapu foi auā o Ierusalem 'seia' alu atu."* O le upu tāua lea, e iloa ai tagata o lo o finau i le manumalo - 'UNTIL'. We will never stop proclaiming your name, 'until' you do and fulfill your promises to Jerusalem.

Ia ona fai ai lava lea, o le mea leni, e pei o se finauga. Pei o se finauga ua nofonofo le Atua, a o la e tauanau e tagata. Le Atua e, sa e faia le folafolaga, ua e lē faia ea o le a? Matou te lē faalologo pe mapu seia matou vaai, i le malamalama ma le olataga, ua alu a'e mai ia te oe. Asilasila foi i isi fuaiupu na e mulimuli ane, o lo o i ai foi upu na, 'seia' faamauiina e ia, ma faia Ierusalem ma viiga i le lalolagi.

O le mataupu leni sa feagai ma tagata toe foi i Ierusalem. E i ai ona tofia e, e leoleo pa o le aai.

A o le feau maualuga, 'Aua le nofonofo, 'Aua le nofoa'i, 'Aua le faafifilemu, Tautala ma valaau i le Atua, 'Aua le fiu gofie, ae ia finafinai i le tatalo.

Faamanatu pea i le Atua lana folafolaga ae 'aua le tu'ua 'seia', faamauiina e ia Ierusalem, ma faia Ierusalem ma viiga o le Atua. O le agaga o le tagata 'fia ola', O le agaga o le tagata 'fia sa'oloto', o le agaga foi o le tagata 'fia fai manuia'. E lē mapu, pe faalologo seia tali mai le Atua. Ae finau pea i le po ma le ao, finau i le tatalo ma le faatuatua.

A o le tasi lava lea o vaivaiga, o lo tatou olaga saili i le Atua. O lo tatou fiu gofie ma lo tatou lē tautala i le Atua. A o le fautuaga lautele le Ekalesia e, logo i le Atua mea tatou te manana'o ai. 'Aua le fiu. 'Aua le mapu. 'Aua le faalologo, ae tu'itu'i ma saga tu'itu'i pea, finau pea, finau pea ia malo.

Tatou vaavaai foi i le fagatuaga a Iakopo ma le agelu. Tala ua lauiloa, ua lauvivilu foi. Fai mai ua alu le po, o taafifili Iakopo ma le agelu. A ua lata ina ao, ona fai mai lea o le agelu, "Tu'u maia o a'u sei ou alu". Ae tali Iakopo, "Ou te lē tuuina atu oe e te alu, seia e faamanuia mai". Ona fesili lea o le agelu; "O ai oe?" "O a'u o Iakopo". Fai mai le agelu; "E lē toe igoa oe ia Iakopo, o le a sui lou igoa, o le a e igoa ia

Israelu.” Ae pe se a le uiga? Auā ua pei se alii, ua e finau i le Atua atoa ma tagata, ma ua e manumalo. Finau pea ia malo, ae ‘aua le faalologo, ‘aua le mapu, aua foi le nofonofo ma gūgū ae logo pea i le Atua. Ae faapea foi le mea na maua ai e Elisaia le tagata o le Atua, meaalofa o le agaga sa i le perofeta o Elia. Manatua foi le tele o nofoaga, sa fealuai ai Elia i le faia o aoga faa-perofeta i na ona po. Ae taumulimuli lava Elisaia i le mea e alu i ai Elia. Tiga lava ona taofi atu Elisaia e Elia, “Elisaia, faatali atu ia iinei”, a o le tali lava lea a Elisaia ia Elia, “O lo o soifua le Alii, ou te lē tu’ua lava oe”. Ua aga’i atu i Ioritana, ua sauni e sopoia le isi itu o le vaitafe o le Ioritana. Ona tago ai lea o Elia i lona ofu tele, ua ta ai le vaitafe o le Ioritana, ona vaeluaina ai lea, ma avea ma alititai mātūtū, ona la savavali ai lea i le isi itu. Ua silafia e Elia, ua latalata mai le taimi e alu ae ai i lona tamā. Ona fesili lea o Elia ia Elisaia, pe se a se mea, ou te faia mo oe, meamanū e lei aveeseina a’u ia te oe? Ona tali lea o Elisaia e faapea; “Ia faalua mai lou agaga ia te a’u. Elia, a o lei aveeseina oe, ia faalua mai lou Agaga ia te a’u”. O le uiga o lea mea, o le faaopopo mai o meaalofa a le Atua sa ia Elia mo Elisaia, e fai ai le galuega. O moomooga ia sa ia Elisaia, na afua ai ona faaumiumi ona taumulimuli i le tagata lenei o Elia. Manaia o le tagata finau, ma finau pea, e lē faavaivai, pe solomuli. E le vale lava le taui. Ia o le ituaiga finau lena, e a’oa’o atili mai ia i tatou i lo tatou fiugofie. O tatou o Kerisiano i lo tatou fiugofie i lea mea, ma lea mea. E lē faigofie le Ioe mai o le Atua. E lē faapea na ona tatou fai atu lava ma Ioe mai le Atua i mea e naunau i ai o tatou loto, e leai. ‘Aua le faalologo, auā o Siona, ‘aua le mapu auā o Ieruselema. ‘Aua le nofonofo ma faatalitali, ‘aua le faafifilemu, ae tu’itu’i ma saga tu’itu’i pea. Finau ma finau pea e ala i le tatalo, ‘aua le fiugofie, ‘aua le mapu e tautala ma talanoa i le Atua, se’ia faamauina e le Atua ma faia Ieruselema ma viiga o le Atua.

Le Ekalesia e, o tatou uma e vaivai, ae maua le malosi, e maua foi le manuia e le tagata vaivai ae taumafai. A o le faalogologotiga ma le fiugofie, e malo pea le faavaivai. E i ai le faitau, *e lelei a le vaivai ae taumafai, ae a vaivai palaai, e leai se mea lelei e maua ai*. Leitioa foi le tautinoga a le aposetolo o Paulo e faapea; “Po o ai le ua vaivai, ou te lē vaivai ai, po o ai foi le ua tausuai, ou te le tiga ai?”. Aisea? Ua talitonu le aposetolo i le tāua o le ola finau, ola tauivi, ola saili i le Atua, ma le lē

faalogologotiga. E lei avea fatia ma mea matautia sa tutupu i le anofale o lana galuega, na toetoe a uma ai lona ola. O ona maosiosi ma mailaila i le galuega e faia pea mo lona Alii. E lē faapea ua feāu galuega sa ia faia, peitai o lona lea moomooga, e tapena mo se isi laasaga i le lumanai. Fai mai le aposetolo o Paulo, ua faafia ona upuvaleina, ma ta’u-lē-aogāina e tagata lona tautīgā? A o le itu sili ona matuitui i le aposetolo, auā e lē o se manu’ a mai fafo o loo afaina ai, a o le manu’ a lava mai fale. O ona lava uso, toto ma aano na faavaatu’ia ai lana galuega. Peitai o ana upu ia, ua iloa ai se tautinoga a le tagata faatuatua, “Po o ai ua vaivai, ou te lē vaivai ai, po o ai ua tausuai, ou te lē tausuai ai.” Tagata finau pea ia malo. E lē avea le sē ma mea e faalavelaveina ai lona olaga taumafai mo le Atua ma Lona malo. E ui a ina ‘uti’uti lona tamaoiga, ma lē ‘a’u lana faasoa, ae e le’i afaina ai lana auunaga ma lona fia fai mea sili mo le Alii. A o lona agaga, “Finau pea ia Malo.”

Le Ekalesia pele e, a le Atua, malo le faatoatoa, malo foi le tauivi, o lea ua tatou aga’i atu i le faai’uga o lenei tausaga. E ui lava ina lutia la tatou folauga i peau vale o le soifua ma lo tatou ola i le faamai oti o le Koviti-19; ua a’afia ai le gasologa masani, o fuafuaga a le tagata i aso taitasi. Peitai, tatou te lē solomuli pe faavaivai ai, e faia pea mea sili mo le Alii e ala i lana Ekalesia. O le masina o lumana’i ia Novema, o le faiga-Taulaga Samoa a le Ekalesia pei ona masani ai i tausaga taitasi. ‘Aua nei avea le Koviti-19, e ‘alofaga i ai lo tatou vaivai. Manatua o le tagata finau, ma saili malo, po o le a le vaivai ae taumafai, ae a vaivai pala’ ai, ona faigofie lea ona iloa le faavaivai. O le uiga lea o le faamalosi a Iesu i le soo o Simona Peteru, na ia fai ane ai, <sup>31</sup>*Simona e, Simona e, faauta, ua mana’o tele Satani ia te outou, ia lūlū ia te outou pei o le saito; <sup>32</sup>a ua ou faatoga mo oe, ina ne’i mavae lou faatuatua.*” (Luka 22). ‘Aua nei avea faafitauli ma faafatiamata’i i nei ona po, e afaina ai lo tatou saili malo i le Atua ma Lona malo. Ia manuia tele le alo atu o le Ekalesia i lana Faiga-Taulaga o lenei tausaga. Finau pea, ma finau pea ia malo!!

*Saunia: Maaola. S. Roma FS*

*EFKS New Lynn*

*Matagaluega AUKILANI*

*(O le Lauga lenei na saunia mo le Sulu o Novema, ua sui ai lea na fuafua mo Oketopa ua le saofia, ona o a’afiaga o le Faama’i Koviti-19).*

---

# USUIA LE FONOTELE FAAFUASE'I 2020

---

*(O le a mafai ona silafia e le mamalu o le Ekalesia le tala aloa'ia o taualumaga ae maise o l'ugafono o lenei Fono Tele Faafuasei 2020 (FTF20), i le Tusi Iugafono Fono Tele Faafuase'i 2020 pe a mae'a lona lomiga, o loo saunia e le Susuga Failautusi Aoa ma lona Ofisa. Ae ua na o se faamaumauga 'oto'oto lenei o le FTF20 mo le silafia e le mamalu lautele o le Ekalesia, ae maise o faamaumauga mo ana augatupulaga mulimuli mai).*

“IA MATAALAPEA” (BE AWAKE) - o le manatu autu lea o le Fono Tele Faafuase'i 2020 (FTF20) a le Ekalesia Faapotopotoga Kerisiano Samoa na usuia i le Aso Tofi & Aso Faraile (15-16 Oketopa 2020) i lona Maota Fono i Malua. O lenei FTF20 na fa'aaoga ai fesootaiga i auala faatekonolosi (ZOOM) e fesoota'i, silasila ma faafofoga auai mai ai usufono o Komiti mai Matagaluega i atunuu mamao, faapea foi le toatele o usufono mai Komiti eseese a le Ekalesia i Samoa nei, sa mafai ona fono mai o latou maota ma laoa e fa'aaoga ai laau ma masini komepiuta. Ua faia lenei faatatau ina ia tusa ma poloaiga a le Malo Samoa mo puipuiga o le Faama'i Koviti-19, e na o le to'a 100 le aofa'i o tagata i se faapotopotoga i Samoa nei, ae o loo tapu femalagaa'iga faavaomalo ona o lenei Faama'i. Sa le'i mafai ona usuia le Fono Tele i le masina o Me o le tausaga nei, ma o le faatofalaiga lea a le Laulau Fono Tele ma le KMTA, ia tusa ai ma le Faavae o le Ekalesia, ina ia valaau le Fono Tele Faafuase'i, e soalaupule ma pasia ai nisi mataupu faanatinati e tatau ona faia i ai se faai'uga. O nei mataupu e aofia ai le Tala o le Tupe 2019 ma le Ripoti a le Su'etusi mo le tausaga faaletupe 2019 - 2020. E faapea foi le Tala Faatatau o Tupe 2020-2021 mo le faagaioiga o galuega fa'aaaua a le Ekalesia. Ma nisi mataupu talafeagai e agavaa e tusa o le natura faafuase'i o le Fono Tele.

O le uluai aso 15 Oketopa na faia ai le tauvalaauga o i latou o sui filifilia o Komiti taitasi mai Komiti tetele e 6 a le Ekalesia (Komiti Au Toeaina, Komiti Feau Eseese, Komiti Tupe, Komiti Aoga, Komiti Faamisionare, Komiti Atina'e), faapea foi le Komiti Au Taumafai ma le Komiti Au Leoleo, ma le Mafutaga Tina. Na amata le tauvalaauga i usufono o Komiti mai Matagaluega e 9 i Samoa na filifilia e fono i totonu o le Maota Fono i Malua (to'a 100),

ona sosoo ai lea ma usufono o Komiti mai Matagaluega e 10 i atunuu i fafo - Amerika, Aukilani, Hawaii, Kuiniselani, Kuiniselani Saute, Manukau, Niusaelese Saute, Niusaelese, Niusaelese Sisifo, Vitoria, faapea usufono mai Fiti ma Amerika Samoa, ma faai'u ai i usufono o Komiti i Samoa sa fono mai o latou maota ma laoa. E maualuga le agaga faafetai i le Atua ona o ana faamanuiaga i auala o fesootaiga ma faasalalau faatekonolosi faaonaponei ua mafai ai ona faatino fonotaga, o tapuaiga ma faatasiga faavaomalo.

O le susuga Tunumoso Iosia FT le Taitaifono Fono Tele 2019 - 2020 na taitai le sauniga lotu sa amata ai le FTF20. O le Manatu Autu o le FTF 2020 - IA MATAALAPEA, na autu i ai le Lauga faavae i le Tusi Faitau o lea aso (IBRA) Mataio 24:33-44. Na faamafanafana ma faamanatu ai le tiute o le Ekalesia ina ia mataala i ona nafa faalefaatuatua e tusa ma lona valaauina mai le Ao o le Ekalesia, ia mataala i suiga tetele ma aafiaga ogaoga o le Ekalesia ona o faalavelave ma upufai o malo, ina ia 'aua le faamanupo'ia i ofaga pe a oo mai le i'uga, e pei o i latou i aso o Noa na fano ona o le lē mataala. Na mae'a le sauniga lotu ona ia saunoa faafeiloa'i lea i le mamalu o usugafono i Laulau a fono ma usufono mai le nofo a Komiti o le Ekalesia. Sa ia faafetaia le Ekalesia i le onosa'i ma le faapalepale e faafetaia'i tulaga ogaoga ua aafia ai le lalolagi ato i nei aso ma ona aafiaga i le galuega a le Ekalesia. Sa le'i aunoa foi lana faamalo ma le faafetai i le soifua fai taulaga o le Ekalesia mo le Tala Lelei i le masina ua tuana'i, e ui ina feagai ma faalavelave faigata ua afaina ai le tamaoiga, ae o loo molimauina pea le aao mafola ma aao foai o le Ekalesia ona o le alolofa ia Keriso ma le Tala Lelei - ia faamanuia tele le Atua e tusa o le faiga taulaga o le Tala Lelei 2020. Ona tatala aloaia ai lea e lana afioga i le Taitaifono Fono Tele o le Fono Tele Faafuase'i 2020. O le uluai mataupu na tagofia e le FTF20 o le faamaonia lea o galuega a Komiti sa feagai ai i le tausaga faafono 2019-2020. O le faasologa masani amata mai le Komiti Tupe ae taualuga i tala o galuega a le Komiti a Tama o le Ekalesia. Ma e mae'a ane le fonotaga o le ulua'i aso ua pasia uma galuega a Komiti, ina ua uma ona tali nisi fesili ma faamalamalama nisi mataupu sa lāgā e usufono. O lona lua o aso, o le aso mulimuli foi lea, na taitaiina ai le sauniga lotu amata e le susuga Sui Taitaifono o le Fono Tele, Iosefa A. Uilelea FT.

---

Sa fa'aaogaina le tusi faitau o lea lava aso (IBRA) Mataio 25:1 - 13, o le Faataoto i Taupou e To'a Sefulu, ma le manatu autu - Faatalitali ma Mataala Pea. O le feau faamanatu faala'ei'au mo le Ekalesia ina ia mataala pea ma faatalitali ma le faatuatua i taimi uma ae maise i aso louloua, i le fa'aali mai o le alofa lavea'i o le Alii Faaola o Iesu Kerisole Ao o le Ekalesia. Na saunoa le Taitaifono e faaleo le faafetai a le FTF20 i le tofi o le taeao, ma faagasolo ai loa taualumaga mo le toe aso nai Malua.

Sa i ai nisi mataupu e tasi pe lua na manaomia ai se faai'uga faanatinati a le FTF20 ma sa faapea lava ona muamua liuliu i ai le faatofalaiga a le Ekalesia. Ona faasaga lea o le Fono i le Lipoti a le Su'etusi (Su'a Rimoni Ah Chong) mo Tala o Tupe i le tausaga faaletupe 2019-2020 ma pasia ai. Na faafetaia le afioga a le Su'etusi mo le galuega e le gata o lenei tausaga ae faapea foi lena tausaga ua tuana'i a o avea ai ma Su'etusi a le EFKS. Na soso'o ai ma le talanoaina o le Tala o Tupe, o le Tala o Faiga Taulaga 2019, ma pasia ai ina ua uma ona malamalama nisi mataupu sa fesiligia. Soso'o ai ma le Tala Faatautu o Tupe/Paketi mo le tausaga 2020-2021 - lea foi ua faamoemoe tele, pe a tusa ma le finagalo agalelei o le Atua, i le aao foai ma le lima mafola masani o le Ekalesia i lana faiga taulaga. Na saili le Suetusi mo le isi 2 tausaga e tusa o le faasinoga a le Faavae, ma filifilia ai le ofisa suetusi o Su'a ma Pauga Associates mo le ulua'i taimi mo lenei galuega a le Ekalesia. O le Komiti Tupe na folasia i luma ma faamaonia e le FTF20 le suiga o le laulau a le Komiti. Ua faamavae le afioga ia Hon. Tuiletufuga Lemamea Ropati AF(Sui o le Fono Sui Tofia) sa avea ma Taitaifono talu mai le tausagae 2014. Ua filifilia nei e ala i le palota le tofa Tuiloma Faitasi Gae'e AF e avea ma Taitaifono Komiti Tupe. Ia silafia o le fonotaga faa-faavae a lea Komiti i lenei lava tausaga na filifilia ai le susuga Keneti Leaupepetele FS e avea ma Failautusi e sui ia Susuga Alesana FS ona ua gasegase. O le Komiti o Feau Eseeese na latou tuuina mai i luma o le FTF20 le fautuaga ina ia faatau se taavale fou mo le Sui Taitaifono Fono Tele, ona o le taavale sa i ai na talosagaina e le afioga Taitaifono talu ai susuga Tautiaga Senara FT na te faatauina, ma talia e le Fono Tele. Ua pasia ai nei le faatauina o le sa fou mo lea tofiga o le Laulau Fono Tele. O le mataupu na taualuga ai taualumaga o le FTF20 o le Faamavaega a le susuga Rimoni Wright FS mai lona tofiga Teutupe a le Ekalesia, ina ua valaauina o ia e le EFKS Matautu Falelatai e avea mo latou Faifeau.

E tusa ai ma le Faavae itulau 22, o le Teutupe "e tofia mo tausaga e tolu (3), a ia le silia i le ono (6) tausaga sosoo lona seei ai i le tofi." O le susuga Rimoni na ulua'i filifilia e avea ma Teutupe i le tausaga 2015 ma sa atoa le 3 tausaga i le 2018; na toe filifilia i lea tausaga mo le isi nofoaiga, ma e faa'uma lana 6 tausaga sosoo i le tausaga 2021 pe a aulia i le alofa o le Atua. Na sa'ausi le faatofalaiga a le Ekalesia i lenei mataupu ma fefulisa'i faa-laaui mamafa ona o le lavelave ma aafiaga eseese o le Faavae. Ona faia lea o le faai'uga e talia ai le Faamavaega a le Teutupe, ae galue pea o ia seia oo ina osia la latou feagaiga ma le EFKS Matautu Falelatai. Na taualuga le FTF i le tapuaiga faai'u na ta'ita'iina e le afioga Taitaifono Fono Tele, susuga Tunumoso Soliola Iosia FT - o le Tusi faitau Luka 24:29-32 ma le matua i le fuaiupu 32, "*E le'i mu ea o ta loto i totonu ia i ta'ua, ina ua fetalai o iaia te i ta'ua i le ala, ina ua faamatala mai foi e Ia o Tusi ia te i ta'ua?*" Ona taumavae lea i saunoaga faai'u, ua tapunia aloaia le FTF20, ua lūlū ma talotalo aao, feofoofota'i ma faatōfā i usugafono mai atunuu mamao faapea ma Samoa nei. Faafetai faamalo le Atua i lau pule alofa seanoa lea, e le mafai ona faataunuu le faamoemoe o lau Ekalesia; e talosia foi lea lava agalelei tunoa, e ta'ita'i manuia le faigamalaga a le Ekalesia, ma aulia manuia le aso e tauaofia ai le isi ana Fono Tele. E moni Afioga Paia a le Atua, i Lona galue ai i mea uma mo le lelei ma le manuia o e alolofa ia te Ia (Roma 8:28); o le Atua e mataala pea i taimi uma, o le leoleo i Lana Ekalesia e le tulemoe e le moe lava (Sala.121:4). Aua ua oo mai aso leaga e ala i Faama'i, ae ua saunia auala o fesoootaiga faatekonolosi, e faigofie ma taugofie, e faataunuu ai feau a Lana Ekalesia. Ia saga viia pea Lona suafa e faavavau.

Ia manatua o nisi Fono Tele Faafuase'i a le EFKS i le 40 tausaga talu ai:

16/1/1980 - Malumalu EFKS Apia - e tapena ai le Faamanatuina o le 150 tausaga Tala Lelei i Samoa.  
9/9/1987 - Malumalu EFKS Apia - e saili se tasi e sui tulaga i le susuga Lale Jeremia FS i le tofi Failautusi Aoao EFKS - na te'ena lea mau a le KAT.

16/8/1990 - Ioane Viliamu - e pasia le \$450,000 e faalelei ai le Malumalu Iupeli; ma filifilia ai Fuata'i Tuautu FT e avea ma Sui Taitaifono Fono Tele e sui tulaga ia Uilelea Uilelea FS ua maliu.

29/8/1991 - Ioane Viliamu - e toe talanoa ma pasia le Tala o Tupe 1990 na te'ena e le F. Tele 1991.

---

## **PENISIONE TAITAIFONO KOMITI AU TOEAINA**

---

*“<sup>29</sup>Le Alii e, e te tuuina atu nei lau auauna, ia alu ma le manuia, pei o lau afioga; <sup>30</sup>auā ua iloa e o’u mata lau faaolataga, <sup>31</sup>ua e saunia i luma o nuu uma lava; <sup>32</sup>o le malamalama e faamalamalama a’i nuu ese, ma le mamalu o lou nuu o Isaraelu.” Luka 2.*

O upu ia o le Pese a Simeona (Nunc Dimittis) na tomua ai le Tapuaiga, o le sauniga faapitoa e aloaia ai le Penisione a le susuga Tavita Anesone FT ma Lupe Monika o le faafeagaiga taulagi o le EFKS Alafua, Toeaina o le Pulega Faleata Sasa’e, KMTA o le Matagaluega Faleata, a o le Taitaifono o le Komiti Au Toeaina. O lea sauniga na ta’ita’iina e le susuga Faau’uga Mata’utia FT o le Toeaina o le Pulega Faleata Sisifo, i le Aso Sa 25 Oketopa 2020. Na faatumulia le sauniga i le mamalu faalemalo, faale Ekalesia, faaleatunuu, o aiga ma uo pele a le auga o aute o le aso. Na auai le Afioga i le Ao Mamalu o le Malo, Afioga Tuiaana Tuimalealiiifano Vaaleto’a Sualauvi II (o se tasi o Matafale faavae o le EFKS Alafua ina ua faato’a faatuina i le 1979), faapea le Afioga i le Sa’o Faapito Hon. Fiamē Naomi Mataafa, afioga Aliimalemanu Alofa Tuuau MP (o se Matafale o le EFKS Alafua) o faauluuluga o Matagaluega ma Ofisa o le Malo ma Faalapotopotoga. O le Taitaifono & Sui Taitaifono Fono Tele ma le afioga Teutupe, o sui o le KMTA, Toeaina Faafeagaiga ma Faletua o le Matagaluega Faleata na latou tau fai molimau i lea aso taua. O le susuga Amosa Reupena FS (EFKS Vaimoso, Failautusi Pulega Faleata Sasa’e) na ta’ita’i le faitauina o le Tusi Paia: F. Tuai - Faataoto 3:19-26 (Tusi Faitau Aso).

O le susuga Iosefa A. Uilelea FT le Failautusi Komiti Au Toeaina, na saunoa e faalauiloa le talaaga o le Toeaina ma le Faletua Penisione ma la la’ua auaunaga i le EFKS; na faavae lana saunoaga i le fetalaiga a le Alii e ana le galuega, *“<sup>1</sup>Lo’u Tamā e, ua oo mai le aso. <sup>4</sup>Ua ou faaumaina le galuega na e tuuina mai ia te au, ou te faia.” Ioa. 17.* O le susuga i le Toeaina ia Tavita na soifua mai i le aso 18 Aokuso 1950, mai le afioaga o Mulinuu (sa faifeau ai ona tua’a EFKS Mulinuu a o tausī e le EFKS), ma Safaato’a Lefaga. O le tina ia Monika Lupe Saifoloi, o lona afioaga o Vailoa-tai, Amerika Samoa; na la’ua faaipoipo i le aso 16 Iuni 1979. O le tausaga lava foi lea na amata ai lo la’ua soifua tautua i le EFKS, ina ua faavaeina le EFKS Alafua, ma ave ai i la’ua o ulua’i feagaiga taulagi a lea Aulotu seia oo mai nei, **ua atoa ai le 41 tausaga o lenei auaunaga paia.**

O Tofiga o le Toeaina Penisione ia Anesone:

1990 - 2001 - Failautusi Pulega Faleata Sasa’e

1993-1997 - Komiti Au Leoleo

2001-2020 - Toeaina o le Pulega Faleata Sasa’e

2011-2020 - KMTA Matagaluega Faleata

2016-2020 - Taitaifono Komiti Au Toeaina

(Ia silafia e galulue le Toeaina ma le Faletua i le EFKS Alafua i le 1979 a o tasi le Matagaluega a APIA mai Toamua e oo i Fagaloa. O le tausaga 1984 na vaeluaina ai APIA i Matagaluega e 2: APIA SISIFO ma APIA SASA’E. Mulimuli ane i le tausaga 2006, sa toe vaeluaina APIA SISIFO i Matagaluega a FALEATA ma APIA e pei ona oo mai nei 2020).

O le saunoaga leni a le Failautusi Komiti Au Toeaina:

***“Lau susuga i le Toeaina Anesone ma le Faletua Lupe, se ua malo tau, malo finau, malo le faatoatoa; malo alofa i le Atua ma lana Tala Lelei. Tama, i le faatinoga o ou tiute faata’ita’i, ae maise i le souā o le vasa, o le upu moni sa e tu i le foe mua. Tainane foi le viligia o le sa o le Ekalesia, sa e ulimasao. E manatua pea lou finagalo faaleatua, o lou loto maualalo, lou to’amalie ma le faautauta, ma le tele o meaalofa a le Atua sa e faasoa mai; ae silisili lou loto mamā, na fanau mai ai lou onosa’i, lou faapalepale ma lou alofa moni faatamā. Lele ua a’e manuia faiva, sa oulua tiu ai i ā’au mamao ma ā’au lata. Anesone ma le Faletua, e le selu atu, a o le upu moni, o oulua isi faleā’oga tāua ma aogā mo lo matou ola e fa’aauau le galuega a le Atua, i le lotoifale faale-aulotu i Alafua nei, i le Pulega, Matagaluega ma le Ekalesia Aoao. Mapu ane ia i Niafane, ma lafo le taula i Mālolo. O le tatalo a le Ekalesia, ia alofagia pea oulua e le Atua ma Ia faamanuia tele atu. Ia taumamao ni ao lealeama ni tuātaafalu. Tatou taumavae i le mavaega a Tavita ma Ionatana, ‘O le Alii, e va ai i ta’ua.’***

Na valaaulia le afioga Taitaifono Fono Tele na te tauaoina ma faapipi’i le Pine Aloaia o le Penisione faapea le meaalofa tupe \$5,000 a le Ekalesia Aoao, a o lona faletua na ia faala’eia le Toeaina ma le Faletua i a la’ua faasolo. O le susuga Misipalauni Faatau FT ma Tafao ua filifilia e sui tulaga ia Anesone ma Lupe i le tofi Toeaina o le Pulega Faleata Sasa’e. O ia na ta’ita’iina Talosaga molia o leni sauniga, ina ua uma

---

ona ia muamua saunoa faaopopo e tusa ma la latou mafutaga i le Pulega ua 31 tausaga, talu ona galulue foi i la'ua i le EFKS Ketesemane-fou i le 1989. Na maua le avanoa o le Mafutaga Tina e faaleo ai lo latou agaga faafetai tele, o alofaaga ma faamanuiaga mo le Toeaina ae maise o le Faletua ia Lupe o le itutino o le Mafutaga. O le faletua o Nofoga A. Leuta le Sui Taitaifono o le Mafutaga Aoa Tina, na fai ma fofoga taumomoli o le Mafutaga e faaleoina o latou sa'afiafiga mo le uso pele i le galuega a Keriso, ma ia faamaloloina i la'ua i le mana o le Atua Foma'i. O le faletua ia Susana Soliola na tauaaoina atu meaalofoa \$5,000 a le Mafutaga Aoa ma le \$5,000 Mafutaga Faletua Au Toeaina (\$10,000 le aofa'i). Na fa'aaloalo le Ta'ita'i o le Sauniga e tu'u le avanoa i le afioga Taitaifono Fono Tele e molio'o le faafetai, faamalo, ma faamanuia a le EFKS i le Toeaina ma le Faletua Penisione. O le Fono Tele Faafuase'i talu ai na aloaia ai lea tulaga, ae na toe fa'aali pea lea lava agaga faamalo o le Taitaifono, ma si'i mai ai le tulaga na oo i ai Mose i le tualuga o lana galuega, e faatusa i ai le tualuga o le tautua a le Faifeau Toeaina EFKS. E manatu nisi sa na ona vaai Mose i Kanana ae le'i oo i ai. Peita'i o le tala i le Liliueseina o Iesu (Luka 9:28-36), na vaai ai le Alii i lona pupula silisili ese, a o faatasi ma Elia ma Mose i luga o le mauga i totonu o laufanua o Kanana. O lona uiga, e mautinoa lava sa oo Mose i Kanana. Ua taunuu le Toeaina ma le Faletua Penisione i le tualuga o le soifua tautua, ma ua vaavaai atu i le Kanana i Luga. O le upu moni e le fesiligia le oo i ai o le Toeaina ma le Faletua ma soo se auauna faamaoni, i le nuu ua uma ona tapena lelei e Iesu, e ulufale i ai ma ofu sisina. O la Iesu, *"<sup>26</sup>O le mea ou te i ai a'u, e i ai foi la'u auauna."* Ioa.12. Tautai a'e!

Ona alo ane lea o le Taitai o le Sauniga i le Lauga, lea sa matua lologo ai le fua ma le pa'o a le faapotopotoga ona o le tapenaga mae'ae'a ma saunia lelei. E tele taeao, a o le "faamoemoe ua taunuu, o le laau o le soifua lea". O le aso lenei ua faia e le Alii, e olioli ai le susuga Toeaina ma le Faletua, e olioli tele ai aiga e ana lupe sa faalele, ma le Ekalesia atoa. Ua fiafia ua malie le lotu, e pei o le toeaina o Simeona sa fiafia ua malie le lotu ina ua vaai mata ma sapaia i ona lima le Pepe o le Faaolataga. *'E te tuu atu nei lau auauna ia alu ma le manuia e pei o lau afioga, aua ua iloa e o'u mata lau faaolataga ua e saunia i luma ...'*

Na mae'a le lauga ona saunoa lea o le susuga Toeaina Penisione e faaleo lo la'ua lotu fiafia ma le faafetai tele, ona o le sauniga lotu ma lenei aso i fuafuaga uma e aloaia ai lo la'ua penisione. I la la'ua Aulotu pele i Alafua, i susuga Toeaina penisione ma faletua (Tavita Roma FT & Tailua), Faifeau nofoaiga, A'oa'o Fesoasoani ma Tiakono, o tamalii faipule ma failauga o le toatele sa avea ma Aoga Aso Sa & Aulavou ina ua la faato'a taunuu ane i le 1979. I le paia o la latou Pulega, faapea le susuga i le Toeaina o Mata'utia ma Maima, le Tiakono Toeaina ma le mamalu lasilasi i le Matagaluega Faleata, tainane le Laulau o le Fono Tele ma le Ekalesia Aoa, le Failautusi ma le Komiti mamalu a le Au Toeaina, ona o le tuuina atu o le faatuatua i lana faatautaiga, ma le lagolagosua na mafai ai ona faataunuu ona tiute. Na ia faasilasila ai lea o le faamutaina aloaia o ona tofiga - o le Toeaina o le Pulega Faleata Sasa'e ua sui tulaga ai le susuga Misipalauni Faatau FT, o le KMTA Faleata ua se'e atu nei i ai le susuga Faauga Mata'utia FT, ma le Taitaifono Komiti Au Toeaina, KMTA, Komiti o Malua, Komiti Aoaoga Kerisiano, ua filifilia i ai le susuga Asotasi Gu Time FT. Ona faai'u lea o le sauniga ina ua fetai fola, ua agatonu foi le saunoaga a le Afioga Taitaifono Fono Tele, i le malelega a le susuga Toeaina Penisione. Ona mapu ane lea o le mamalu sa auai, e tali fa'aaloalo i le taumafataga ma pelega o Faafegaiga Taulagi na ma'ama'au i ai le paia i le EFKS Alafua, ma taape ai mo malologa ma toe sauniga o le Sapati. Mo le silafia o le isi faifeau penisione i Samoa i lenei tausaga o le susuga Siasia Leleimalefaga FS ma le faletua ia Pelelino o le EFKS Vailoa Palauli i le Matagaluega Faasaleleaga. (O le Sulu Samoa o Me 2020 o loo faamauiina ai le tala o le soifua galulue ma sauniga taumavae ma lea foi faifeau penisione).

O nisi nei o aafiaga o le tulaga o faalavelave faafuase'i ua i ai le atunuu ma le lalolagi atoa, ona o le Faama'i o le Koviti-19. E le gata o le tapunia o femalaagaiga faavaomalo, ae o fuafuaga a le Malo Samoa mo le puipuiga saogalemu o le soifua maloloina o ona tagata. O tapu ma sa ua faatapula'a ai le aofai o tagata i soo se faapotopotoga. Ua afaina ai le EFKS i ana tapuaiga, fonotaga, ma le faatinoga o ana galuega masani. Ua le mafai ona usuia le Fono Tele o lenei tausaga, ua faapea foi ona le faataunuu ai ma le Sauniga Lotu Aloaia o Penisione. Ua lafo atu le faamamaluina o Penisione o lenei tausaga, i le nofo a Matagaluega i Samoa ma atunuu mamao.

---

## IA FETU'UTU'UNA'I MUNIAO

### “E LĒ OLE MATUA I LE USUGA, A O LE MATUA I TOFIGA”

1 Samuelu 16 :1-13

Matua: *1 Samu.16:11a “Ona fai atu lea o Samuelu ia Iese, Ua atoa mai ea taulele'a? Ua fai mai o ia, Ua toe lava ole ui'i; fa'auta foi, o lo'o leoleo ia i mamoe”.*

Tasi lenei tala lauiloa i le Tusi Paia, i le fa'au'uina e Samuelu o Tavita e fai ma tupu o Isaraelu e sui ia Saulo. Ae a tatou matua va'ava'ai i ai, e tele lu'i t̄ua mo lo tatou ola galulue i so'o se mea. Auā ole mea ua mautinoa, e le'i i ai Tavita i le taimi o le sailiga o se tupu; o la e moe i le vao i le tausiga o mamoe a lona tamā. Auā o le fesili fa'asuli moni o le gafa o Iese - *Aiseā na lē 'a'ami ai Tavita, a'o le'i faia le filifiliga?* Mea masani a aiga, e talo uma suli... Ae aisea? Ia e tofua lava le tagata ma le tali, ae i le Muniao, E le'i amia Tavita leaga o le ui'i o le usoga, e lē amana'ia, e lē iloa fai se tonu, e leai sona potu masani. “Ia o fea a alalai atu ai lena mosimosi, o la e saofafa'i mai kama matu, ua masani i taua?” O le va'ai lena fa'ale tagata. Lea lava e iloa i upu a le toeaina o Iese, *“Toe lava o le ui'i; fa'auta foi, o lo'o leoleo ia i mamoe”.*

O le tali o lo'o aumai ai le va'ai fa'atauva'a o le toeaina i lona atali'i, aemaise le lē amanaia e tama matutua o lo latou uso laititi. Auā i lo'u lava vaivai, sa tatau ona 'a'ami uma tama, fa'asoa le pule, ma fesiligia po'o fea o i ai o latou loto, i se tasi e saofa'i i le nofoa. Auā e lē taumate e lilifa uma loto i le ali'i o aiga, o Eliapo auā o le ulumatua, ae ua leai lava. Peitai, i le isi itu, o le tali o lo'o fa'amatala mai ai foi le ituaiga tagata e i ai Tavita i totonu ole mafutaga lenei; o le auuuna sa galue ma le loto maulalo, sa galue ma le fiafia ma lona loto fa'amaoni auā se manuia o le aiga. O le filosofia a le taule'ale'a Samoa. *O le ala i le pule, o le tautua.* Auā o le upu moni, na iloa e Tavita le mea la e tupu i le a'ai i lo latou fale. E lē misi lava na text pe na facebook i ai lona tinā ma ta'u i ai, o la e saili se sui o Saulo, i le nofoa ole malo. Leai a ma se popole o Tavita i na mea. Aisea? E lē fia sili ma fia mamalu, e lē fia maualuga ma fia pule, ae fiafia lava e tautua. Auā o le upu moni, e

mafai e Tavita ona fa'aali lana aiā fa'asuli, peitai ua lē o lena, a'o le tautua fa'amaoni. Leaga o le mea lena ua tupu nei, o le fia tausaga o nofo i atunu'u mamao, e lē alofa mai i se aiga, leai se tautua o faia mai i le nu'u, leai se monotaga o faia i le Ekalesia. Ae vevesi loa fa'amasinoga i fanua ma le suafa, faalālā loa le pule fai mai o ia o le suli moni. Ae te'i i le sau, ua lē iloa le mea sa tū ai le umukuka. E tu'ufesili po'o fea o teu ai le toeaina ma le lo'omatua, auā e le'i sau ai i o la'ua toe sauniga. (Fai aku ai foi...)

O le Autū o le Tusiga o lenei masina. “E LĒ OLE MATUA I LE USUGA, A O LE MATUA I TOFIGA” Ua tatou iloa uma lava le mea na tupu. Na amata mai lava ia Eliapo, Apinatapa ma Sama, e leai ma se isi na filifilia e le Atua. Na i'u ina o ifo uma tama i luma o le perofeta, ae fai mai le Atua e ala i le perofeta. *“E lei filifilia e le Atua i latou nei”.* O le ala toe fesili lava lea o Samuelu ia Iese, po'o totoe se isi o le usoga, e lē o auai. O le tali la lea a le toeaina o Iese. *“Ua toe lava ole ui'i; fa'auta foi, o lo'o leoleo ia i mamoe”*

Fai mai le fa'atonuga a le Perofeta, *Ia a'ami atu ia te ia, auā tatou te lē vagaia le mea nei seia sau o ia i'inei.* O le masani i taimi o le fa'amanatuina o le Tutoatasi o le Malo o Samoa, e fa'atali uma le polokalame, aemaise le sauniga Lotu, seia afio atu le Ao mamalu o le Malo. E fa'apena le mea na tupu, ua lē mafai ona fai se tonu, ua lē mafai ona ta'ape le nu'u e o'o lava ia Samuelu ua lē fia faia sana tofiga, a ua fa'atali tagata uma, sei sau le leoleo mamoe.

Fai mai ina ua gasegase le tupu tafa'ifa, o Taufau, e fa'atolu ona alu le ave'a'i i lana tama o Tupuivao, o lo'o ta'aseu i le vao, e sau vave, ua fia ui le 'ula a le tupu ia te ia, ae le'i sau ona o le loto fa'amaualuga. Tavita e lei fa'apena, tasi a le ave'a'i ae sau ma le loto maulalo.

Ina ua taunu'u Tavita i le maota, fai mai le tusitala, *“O ia foi ua 'ena'ena mūmū lona lauulu, ma ua aulelei foi ona mata”.* Taimi a lea na malele mai ai le Tupu sili ia Samuelu, *“Tulai ia, ina fa'au'u ia te ia auā o ia lava lena”.* O le upu la e i ai, *“Ona tago lea o Samuelu i le fagu nifo o suau'u, ua fa'au'u ai ia te ia i luma o ona uso.”* Ese a faiga a le Atua a? Fea o i ai le manatu fa'atauva'a o le au uso i le leoleo mamoe, le tagata pito pologa o le aiga, fai mai e lē iloa fai se tonu, leaga e mosi, o le ui'i e lē onomea i se taitaiga o se nu'u, toe lē maluali'i? Aumai a e le Atua mai le pa mamoe, fa'asaofa'i i le tumutumu o le malo, i luma o mata o ona uso. Leai



---

ma se isi na fia fa'alālā sana aiā fa'asuli, e taofi ai le tofiga, leaga e lē se tofiga fa'ale tagata. O le Atua o le Mata'isau o mea uma, o Lona finagalo alofa, e fa'aeaina ana auauna, o e punonou ma galulue ma le fa'amaoni.

Fai mai le Atua ia Samuelu, ***“Aua e te vaa'i i lona tino, po'o le maualuga o lona tino, auā ua ou tete'e ia te ia, auā e vaa'i tagata i le tino, ae vaa'i le Atua i le loto.”*** Mea lea na fua i ai le silasila a le Atua, e lē tāua le maluali'i, a o le loto ia fa'amaoni ma alofa ma ia onosai i taimi o faigata. E tāua foi le atamai, ae sili ona taua i le Atua le loto e iloa ona fa'amaualalo, ma fa'alagolago ia te Ia. Le loto e talitonu ma fa'atuatua fa'amaoni i le alofa o le Atua. E tāua foi le tau, ae o le loto e punou ma le lē fa'alogologotiga, le loto e le tausili i ni mamalu ma ni viiga, ae galue ma le loto fiafia, le loto e fiafia i le fa'amagalo atu, le loto e lē malui'a gofie i lu'itau o le ola, auā e leoleo le Atua i lana savaliga. O le ituaiga loto lea, na saili ai e le Atua se taitai mo Lona nu'u. O le leoleo mamoe, o se galuega maualalo, e na o pologa latou te faia, a o le galuega maualalo lena na fa'aeaina mai ai Tavita le auauna fa'amaoni.

O le fa'atinoga o le galuega Fa'aola a Keriso, o lea le manulauti, o lona ola ia fano ma fa'aleagaina, a ia ola le tagata. O lona loto lelei, loto mamā, ma lona loto fa'amagalo na maliu ai ina ia magalo le tagata agasala i luma o le Atua. Le mamalu o le au faitau i lena foi masina. Malo le folau! Malo le galulue! Fa'afetai le alolofa i le Ali'i, ma lana Galuega! O le muagagana Fa'a-Samoa. ***“O le ala i le pule o le tautua.”*** Ae o le filosofia a le auauna tuāvae. ***“O le ala i le fa'aeaina, o le galue fa'amaoni.”*** Po'o fea lava o e tautua ma auauna ai, le malo, le kamupani, pisinisi, aemaise le Ekalesia. Ae fa'apea foi le au galulue o le Talalelei, i fata faitaulaga e fia i totonu o le atunu'u, ma fafo atu. Manatua, e tasi lava lo tatou fa'alaniga, ***‘O TATOU O AUAUNA’***. Ina ua maliu Mose le ta'ita'i o Isaraelu, fai mai le Tusitala, ***“Ona oti ai lea o Mose, le auauna a le Ali'i.”*** Leai a ma nisi viiga na fa'alupelupe ai lena ta'ita'i iloga o Isaraelu. Tasi a le fa'alupega, ***‘OLE AUAUNAALE ALI'I’***.

Lea foi a e manino le saunoaga a le Ali'i, i auauna e toalua na i ai taleni e lima ma le lua, ***“LEAUAUNA LELEI E, MA LE FA'AMAONI, UA E FA'AMAONI I MEA ITIITI, OU TE TOFIA OE E PULE I MEA E TELE, INA ULUFALE MAI IA I LE FIAFIA O LOU ALI'I.”*** E lē o

fa'apea mai Lau Afioa le Palemia... Lau Afioa le ali'i minisita... E le o fa'apea mai foi Lau susuga le Toeaina, Lau susuga le Fa'afeagaiga, e leai lava... Tasi lava, ***‘Le auauna lelei e, ma le fa'amaoni...’*** O le upu moni e eseese o tatou valaa'uina, e 'ese'ese taleni ma tofiga a le Atua i lou soifua auauna ma lo'u fa'atauva'a. E 'ese'ese foi meaalofa ua fa'aoloa ai e le Matai, Lana fanau galulue. O isi e maualuga o isi foi e lē taualoga. Ae tasi a lo tatou fa'alupega i luma o le Atua. ***‘O AUAUNAALE ALI'I’***.

Fai mai le Agelu i le Ekalesia i Semurana... ***“IA E FA'AMAONI SE'IA O'O I LE OTI, ONA OU AVATU LEA IATE OE LE PALE O LE OLA.”***

**Keneti Leaupepetele. (F.S.)**

EFKS Savaia & Tafagamanu—Uta

---

### **MAI LE TE'ENA, I LE FAAEAINA**

***“<sup>22</sup>O le maa na lafoa'iina e tufuga fai fale, ua fai lea ma maa tulimanu aupitoaluga.”*** Sa.122 Na siitia mai e Iesu le Salamo lena, ina ua Ia fesiligia le au faresaio pe se a lona uiga? (Mataio 21:42). Na sii e Peteru ia lava upu i lana lauga mai totonu o le falepuipui i Ierusalem, i lana molimau ia Iesu Keriso ma Lona mana na faamaloloina ai le ma'i (Gal.4:11). O loo sii foi e le aposetolo nei lava upu i lana Tusi (1 Peteru 2:7). Sa i ai le talatuu na lauiloa i taimi o le Feagaiga Fou e faasino i le fauina o le malumalu o Solomona i taimi o le Feagaiga Tuai. O le malumalu sa fausia i maa na tofi mai e tagata popoto faapitoa i lea galuega, o maa e tutusa uma le fausaga i foliga, le lapo'a ma le mamafa. Na taunuu ane le isi ma'a e ese mai ai; na vaavaai atu tufuga fai fale ma latou teena, ua lafo ma faataavale ifo i le alia o Ketarono. Ua mavae tausaga ua faasolo ina mae'a le galuega o le malumalu, ona ave lea o le feau a tufuga i le au gaosi maa ina ia aumai loa le maa tulimanu aupitoaluga o le maa autū ina ia faauma ai le galuega. Na tali mai le 'au tofi maa ua leva ona auina atu le maa tulimanu autū. Na manatua le maa lea e ese mai ai, lea na teena ma lafoina ifo i le vanu. Na latou toe faavave ifo e saili, na maua i totonu o le toga vine ua sosolo ai vine ma vao. Na toe faataavale a'e i luga ma tuu i lona tulaga sa fetau lelei ai, o le maa tulimanu aupitoaluga, ma mae'a ai le galuega o le malumalu o Solomona. O Iesu na teena ma lafoa'iina e ta'ita'i o le lotu Iutaia, ua maumalo, ua pule aoao, ua nofo nei o Ia i le itu taumatau o le Atua le Tama. Sa te'ena, ae ua faaeaina. Ia viia o Ia.

---

# A TATOU MEA'AI E TATAU MA LE ASO

---

*O Mafaufauga Faaleagaga i le Tusi Faitau Aso (IBRA)na saunia e le Susuga Dr. Alesana Fosi Palaamo FS, ua faaSamoaina mo le Sulu Samoa.*

*O le susuga Dr. Alesana F. Palaamo FS o le faauluuluga o le vaega o Faatufugaga o le Mataupu Silisili i le Kolisi Faafai'feau i Malua. O le faifeau faau'uina o le Ekalesia Faapotopotoga Kerisiano Samoa, o ana matātā ma su'esu'ega faapitoa e aofia ai Galuega Faafai'feau Kerisiano, Galuega faa-Autalavou ma Agafesootai, o Su'esu'ega i Auala faa Pasefika, Mataupu Silisili ma Fauaufutuaga faaFaifeau. Na maua lona faailoga o le Foma'i o le Tofāmanino (PhD) i le Iunivesite Massey i Niu Sila, o ana su'esu'ega ma tomai i le Galuega Faa-faufautua Faafai'feau o tagata Samoa. O Alesana ma le faletua ia Lemau e toatolu o la'ua alo, o atalii ia Norman, Alex, ma Jayden. O Alesana sa ia ta'ita'iina le aufaigaluega sa faatautaia auala o fesootaiga faatekonolosi faapitoa mo fonotaga faaonaponei (ZOOM) na fa'aaogā i le Fono Tele Faafuase'i na usuia i Malua i le masina nei (silasila i le ata, itulau 16).*

## **VAIASO 25 OKETOPA - 31 OKETOPA 2020**

### **UA TALAMAIE LE LAGI – 2 O LE I'UGA**

#### **Aso Sa, 25 Oketopa.**

Manatu Autu – Atamai e fai ma faavae

Tusi Faitau – Faataoto 3:19-26

*“<sup>19</sup>O le poto na faavaeina ai e le Atua le lalolagi; ua faatumauina le lagi i le mafaufau.”*

O le faalapotopotoga o le Brainwave Trust Aotearoa na te faamamafa uluai tausaga o le tamaitiiti, o se vaega taua i le faatulagaina o lona olaga mulimuli ane pe a avea ma tagata talavou ma tagata matua ([www.brainwave.org.nz](http://www.brainwave.org.nz)). O nei 'uluai tausaga' e masani ona faatulaga mai i le faato'a fanau mai e oo i le tolu tausaga le matua. O le atina'e o le mafaufau mo le tamaitiiti i uluai tausaga e tapu'eina le tele o aafiaga eseese e avea ma faavae mo le a'oa'oina i tausaga mulimuli ane. O tomai i le malosi e faagaioi

o le tamaitiiti, o le maitau ma fa'aaogā le gagana, ma le malamalamaaga o aga fesootai i vaega eseese amata foi ona ati a'e i uluai tausaga o le tamaitiiti. O seuga lauga e masani ona ou fa'aaogā i felafolafoaiga pe a faia fautuaga faasino i tiute faa-matua, e mafuli i le sailiga o le faavae o uluai tausaga o le tamaitiiti o loo aafia. O le Faitauga o lenei Aso Sa o loo faasoa mai ai i le tāua o le i ai o se faavae mautū. O le atamai - le faavae o le lalolagi foafoa a le Atua. O le Atua i Lona poto na Ia silafia mea e lelei mo le lalolagi foafoaina ma Ia mamanuina ai mea uma na faia e tusa ma Lona atamai. Ina ua faalētonu le foafoaga, na silafia e le Atua i Lona atamai pe faapefea ona toe faalelei le lalolagi agasala. Na auina mai Iesu Keriso ina ia faaola agasala a le foafoaga, e ala i Lona maliu ma le toetu i le ola. O Iesu Keriso, le Liutino tagata o le atamai o le Atua, o le faavae lea o lo tatou ulufale i le Malo faavavau o le Atua, e ala i lo tatou faatuatua ma talia Keriso o le Alii.

†*Le Alii e le Atua, foai mai mo i matou lou atamai e faamanatu mai ai ia avea Iesu Keriso o le faavae o matou olaga. Amene.*

#### **Aso Gafua 26 Oketopa**

Manatu Autu – Manatua lou tupuaga

Tusi Faitau – Isaia 51:13-16

*“<sup>13</sup>Ua galo foi ia te oe o le Alii o le na faia oe, le na fofola le lagi, ma faavaeina le lalolagi..”*

O le lotogalo o se vaivaiga e tele tagata e maua ai. Faataitaiga, e galo poo fea na tuu ai le ki o le fale, poo le igoa o au uo sa a'o'oga faatasi i aso ua tuana'i; e tutupu soo nei mea i le tele o taimi. Ae o le tauivi ma le onosai e taumafai e toe manatua igoa, o nofoaga ma mea na tutupu, e toe faasolosolo mālie mai ai lona manatua. O lona uiga, o le taumafai e toe manatua se mea, e manaomia ai le tauivi ma taumafai malosi, ma gaiogiga fuafuaina ina ia alofia ai le lotogalo. O le toe manatua o ou tupuaga o se valaau ina ia 'aua ne'i galo le āiga ma le faasinomaga na faafailele a'e ai oe. O lona uiga ia 'aua ne'i laveia i tatou i le ituaiga tagata ua tatou i ai nei, ona ua miti'ia i tatou i faamanuiaga ma tamaoiga ua maua nei, ae galo ai

le soifuaga faatauavaa na amata mai ma tulaga faigofie na faavae mai ai. O le toe manatua o ou tupuaga o se valaau ia 'aia nei galo le aao o le Atua i le foafoaga, na la faia ai i tatou i le ala na la fuafuaina. E lē o se mea faafuase'i lo tatou tofi ua tatou fananau ma tutupu a'e ai, lo tatou lanu, tagatanuu, aganuu ma agaifanua ma le gagana o tatou tautala ai; o faailoga uma nei o le foafoaga na mamanuina ai tatou e le Atua. O lo tatou sao ia talia le auala ua faia ai i tatou e le Atua ma ia 'aia lava ne'i galo se mea e tasi ua la faia mo i tatou. Ua faamanatu mai e le perofeta o Isaia, taimi o le tafeaga a sa Iutā i Papelonia, le faagaloina e le nuu o Iuta o le toe faafoisia e le Atua o Lona nuu ma aumaia mo i latou le faamafanafanaga ma le faaolataga. O le toe manatua o le Atua e aofia ai taumafaiga malosi ma gaioiga fuafuaina, e pei o le auai i galuega fai a le Ekalesia, o se soifuaga tatalo mautū lelei faatasi ma le sailiili i le uiga loloto o Afioiga paia a le Atua. O nei faatinoga uma latou te faamausaliina o tatou loto ia 'aia nei galo o le Atua na te faia ma foa'i mai, e faala'ei'au ma faamanuia mai i aso uma e lē aunoa.

†*Le Atua lo matou fesoasoani ma le punavai o lo matou ola, fesoasoani mai ia matou manatua pea, na e faia lava i matou ia penei. Ia 'aia nei matou faagalo lou alofa ma lou aiāina o matou olaga i taimi uma. Amene.*

†Mo mafaufauga atili: Ia manatua ma tatalo mo ni tagata se toatolu o e na tofu sao i suiga lelei e tetele

### **Aso Lua, 27 Oketopa.**

Manatu Autu – Viia le Alii e ala ia tatou upu ma faatinoga.

Tusi Faitau – Salamo 148.

*"<sup>14</sup>Ua faamaualugaina foi e ia le nifo o lona nuu, o le viiga o ona tagata amio Atua uma; o le fanauga a Isaraelu, o le nuu o loo latalata ia te ia. Ia outou vivii atu i le Alii."*

O Samoa ua televave lona suiga i auala e tele. Ua oo lava i le viia o le Alii ua afaina i suiga i Samoa i aso nei. O aafiaga e aofia ai suiga faatekonolosi, o faasalalauga i le kelope, o le sailiga o le potu i a 'oa'oga ma le faamausaliina o le tamaoiga, o le faimalaga i atunuu i fafo ma toe foi i Samoa, o mea uma nei ua latou faatupuina se manatu faavae ou te ta'ua 'o le Samoa ua sui'. O se manatu ua o gatasi ma le soifuaga faatagata taitoatasi o atunuu Sisifō, le

soifuaga e i ai taimi e feteena'i ai ma le vaaiga faalenuu potopoto ua masani ai Samoa. O le Samoa ua sui ua na suia le auala e ola ai le Samoa, e aofia ai ma faatinoga o ana tu ma aganuu ua ta'ua o le *faasamoa*. Iaso ua mavae, o le afiafi i le tagi o alisi o le taimi lea ua faatulagaina mo aiga e potopoto ai e fai lotu ma tapuaiga i le Atua. O se ituaso filemū mo aiga e vivii ma faamanū ai i le Atua. O lenei masaniga ua mōu malie atu lona tāua, ina ua faateleina itulā faigaluega, o taimi a'oga, ma fa'aaogā taimi faaopoopo mai fesuaiga o le taimi, mo nisi feau, faamalositino ma taaloga pei o le lakapī ma le volipolo. O viiga siitia i le Alii e ala i tapuaiga afiafi a aiga ua lē tāua i nisi aiga Samoa, ua tusa ma le tulaga ua i ai le Samoa ua sui. O le Salamo 148 ua na faamanatu mai o mea uma ua faia i le lagi i luga ma le lalolagi i lalo nei, e tataua ona latou viia le Alii. O tagata uma, mai tupu o le lalolagi e oo i e matutua ma e lalovaoa e ao ona vivii i le Alii. Auā o le Atua o le Alii ia o le foafoaga, o Le ua na faaola Lona nuu e ala i le faaolataga na faia ia Iesu Keriso i Lona soifua, maliu ma le toetu i le ola faavavau. E ui ina tetele suiga eseese i le lalolagi o tatou ola ai, ae ao ona tatou tumau i le faamaoni i le viia o le Alii e ala i a tatou faatinoga ma tatou upu.

†*Le Atua e, fesoasoani mai ia matou tumau faamaoni i lau Afio e ala i le faasilisiliina o lou suafa i o matou leo, ma le viiga o lau afio e ala i a matou faatinoga. Amene.*

†Mo Mafaufauga atili: O ai le alii e sili? O le sinioga mo faamanuia tau le tamaoiga, le mamalu ma le faaeaina, po o lo tatou Alii le Atua le Mataisau o le Foafoaga o mea uma e tetele ma ninii? Ia viia le Alii!

### **Aso Lulu, 28 Oketopa**

Manatu Autu – E Faavavau

Tusi Faitau – Salamo 102:25-27

*"<sup>26</sup>E faaumatia ia mea, a o oe, e te tumau pea; e pala ia mea uma e pei o le ofu tele; e te liua ia e pei o le ofu, ona liua lava lea."*

I la ma'ua malaga talu ai nei i Roma ma lo'u toalua mo le fonotaga a le Sosaiete Faavāomalo mo Faufautuaga (International Association for Counselling), na mafai ai ona ma asiasi i le aai o le Vatikana ma nisi nofoaga tāua. Na ma'ua maitauina ai le tele o faatagata o tagata faapaupau ma tagata Kerisiano, ma o nei faatagata o tane e telenoa vaganā nai laula'au o le mati e ufiufi ai o latou itutino sā (tulou le gagana). Mulimuli ane na ma'ua iloa ai mai se uu

i Roma e malamalama lelei i ata ma faatagata, e faapea o i latou na gaosia faatagata ma valiina ata, e masani ona latou fa'aalia i latou e aunoa ma ni o latou laei, ona o mea ia e iloa gofie ai le taimi ma augatupulaga na vali, tusi pe mamamu ai se faatagata. I se isi faaupuga, o le mamamuina o faatagata i lenei auala, e avea ai lea galuega e aunoa sona taimi faatulagaina ae faavavau, ia tumau lona taulia ma matagofie mai le uluai senituri e oo mai nei seia aulia le lumana'i.

O le Fai Salamo i le faitauga o lenei aso o loo tusi faasino i le natura faavavau o le Atua. O le tusitala o le Salamo 102 e manatu o le tupu o Tavita, o Tanielu poo Neemia. O ai lava lea tusitala, ua maitauina o loo i ai o ia i se tulaga atuatuvaale ma le puapuagatia. Peitai e maua le faamafanafanaga i le Atua, o Le na faia mea uma ma e tumau e au tupulagā e leai sona i'uga. E lē mafai ma e lē tatau ona faatapula'a le Atua i soo se ituaiga taimi. O le Atua e faavavau ma e i tala atu o le foafoaga uma auā o le Atua e aunoa se taimi. E faapena foi, ona leai se taimi faatapula'a o Lona alofa. Na ositaulaga le Atua i Lona Alo e toatasi mo agasala a le lalolagi ma le foafoaga. O Iesu sa le'i mafai ona taofiofia i le oti poo le tuugamau, ma sa toe tu manumalo mai, mo i latou uma e talia ma faatuatua ia te Ia, ia mafai foi e i latou ona ola faavavau, i le malo ua uma ona saunia e le Atua i tala atu o lenei olaga.

†*Lo matou Atua faavavau e, fesoasoani mai ia matou manatua o lau Afio e silisili i mea uma ma e tumau lou faavavau e i tala atu o le faitauga o taimi. E mafaia mea uma i lau Afio, lo matou Alii e. Amene.*

†*Mo Mafaufauga Atili: Ia taumafai e mafaufaufu toto'a ma manatunatu loloto i le asō. E leai se tapula'a o avanoa; o i tatou lava e fausia ma faaitiitia o tatou lava tapula'a.*

### **Aso Tofi, 29 Oketopa.**

Manatu Autu-Onosai o le afe tausaga i le aso e tasi. Tusi Faitau – 2 Peteru 3:8 – 13

*“A e 'aua ne'i lilo ia te outou, le au pele, lenei mea e tasi, e tusa i luma o le Alii le aso e tasi ma tausaga e afe, o le afe foi o tausaga e tusa ma le aso e tasi.”*

A o o'u ola a'e muamua i totonu o le EFKS Vailoa, Faleata i Samoa, sosoo ai ma le EFKS Bankstown i Sini, Ausetalia, e i ai taimi sa ou manatunatu ifo ai

pe faapefea lenei mea o le avea ma faifeau. Ona o a'u o le atalii o le faifeau, sa i ai le naunautaiga o lo matou aiga ma isi tagata, e tatau ona i ai se tasi o i matou e mulimuli atu i o matou matua, i le avea ma faifeau po o le faletua o se faifeau. Ina ua manuia la'u suega e ulufale ai i le Kolisi Faafaifeau i Malua e a'otauina ai mo tausaga e fa e fai ma faifeau, sa ou fesili i lo'u tamā mo fautuaga i le avea ai ma a'oa'o. Na fai mai o ia ia te a'u, ina ia ou onosa'i ma ia ou lavātia mea uma. E le gata i lea, ae na lu'iina foi a'u e lo'u tamā i lona faapea mai, afai e alu alu ae ou faavaivai ua lē gafatia le mamafa o su'esu'ega ma galuega i le a'oga i Samoa, ma ua toe fia foi atu i Sini, ia ou iloa lelei, o le taimi tonu lena e mana'omia ai lo'u onosa'i ma taumafai e lavātia mea uma.

Ua fa'aali mai e le Atua pe faapefea ona onosa'i, ina ua avea tausaga e afe e pei o le aso e tasi ia te Ia. O le faitauga mai le Tusi e lua a le aposetolo o Peteru ua na a'oa'o mai ia i tatou le Atua e tumatila nai lo le faitauga o taimi. E faatali ma le onosa'i le Atua mo lana tagata na fai ina ia toe fuata'iina, ia salamō ma toe foi atu i le Atua i le faatuatua, e ala i le faia o Lona finagalo paia. O le Atua o se Atua onosa'i, e lē pei o le tagata e lē lava lona onosa'i i le taumafaiga e faamalie ona mana'o ma ona tu'inanauga o le lalolagi. O lenei Tusi ua na a'oa'o mai ina ia tatou mataala i a'oa'oga sesē faasino i le Atua, ia salamō mai a tatou amioga faalelalolagi, ma toe foi atu ia te Ia a o le'i oo i le aso o le Atua e toe afio mai ai lo tatou Alii e faamasino i mea uma o Lana foafoaga.

†*Le Alii e, faamagalo i matou ona o le tele o nisi taimi e te gaseā i le faatali ia i matou. O lou faapalepale ua tuufaafegai lava lea ma lo matou lē onosa'i pe a matou saili na o mea o le lalolagi ma ona tu'inanauga. Fesoasoani mai ia matou talitonu i lau Afio ma ia matou toe foi atu ia te oe. Amene.*

†*Mo Mafaufauga Atili: Ua tatou soona pisi ma vevesi solo ea i le olaga o aso taitasi ua lē manatua ai le Atua? E ao ona tatou faifaimālie, ia tepa a'e i luga mai a tatou meafaigaluega, ma ia iloa atu le alofa o le Atua o loo si'osi'oina i tatou.*

### **Aso Faraile, 30 Oketopa**

Manatu Autu-Lafoa'i i le ola tuai, ulufale mai le ola fou. Tusi Faitau – Fa'aaliga 21:22-27

*“<sup>23</sup>E lē aogā foi i le aai ona pupula i ai o le la, po o le masina; auā o le pupula o le Atua ua*

---

*faamalamalamaina ai ia, o le Tamai Mamoe foi o lona moli lea.*”

‘Ua fou mea uma’: o le tasi lenei auala e malamalama ai le faitauga o le asō. O le Aso Sa o Tamaiti i Samoa o le aso e tasi o le tausaga e faafiafiaina ai tamaiti uma i le tele o mea fou. O le Aso Sa lona lua o le masina o Oketopa i tausaga taitasi e ta’ita’iina ai sauniga lotu e le fanau laiti ma tupulaga talavou. O tala o le Tusi Paia ma le feau o le Tala Lelei e toe faamatala e ala i tala, o siva faaleagaga ma faaevagelia, o fatuga ma pese lotu. E faapea foi ona faatinoina ai tala e a’oa’oina ai le soifuuga faa Kerisiano. O le Aso Sa e la’ei ai e fanau uma o latou ofu papa’e, o ofu fou e faatau e matua ua faapitoa lava mo le Aso Sa o Tamaiti. Pe a mae’a le sauniga lotu o le afiafi, ona fai lea o le ‘toona’i’ a le Aoga Aso Sa, o le taimi e la’ei ai foi o latou ofu ‘ai fou na saunia pe na faatau mo lea faamoemoe faapitoa.

O le faitauga o le asō o se vaega o le faasologa o fa’aaliga na vaaia e le aposetolo o Ioane i le uluai senituri, a o fa’aunu’ua i le motu o Eleni e igoa o Patamo. O le fa’aaliga patino lenei o loo faamatala ai le oo mai o se aai fou, o se Ierusalem fou mo tagata faatuatua o le Atua. O faitoto’a o le aai e matala pea mo i latou uma ua toe faafouina. O le aai e lē manaomia ai se malumalu e pei o le Ierusalem tuai, auā o le Atua ma le Tama’i Mamoe e afifio i la’ua i totonu o le aai fou. O le pupula o le Atua ma le Tama’i Mamoe o lona malamalama lea e suluia faasoloatoa ai le aai. E leai se pouliuli e leai se pogisa. O malo e nofoia le aai e faatagataina e i latou ua toe faafou, e leai ni faailoga lē mamā o latou olaga muamua o loo totoe ai. O le saofagā i totonu o lenei Ierusalem fou, o le faatuatua i le Atua ina ua faamamāina i le toto o le Tama’i Mamoe na osi ai le taulaga mo tagata uma.

† *Le Alii e, faafetai mo le Ierusalem fou o loo faatali mai i ou tagata faatuatua uma i tala atu o lenei olaga. Fesoasoani mai ia matou lagolagoina le soifua o i latou e talafeagai ma lou mamalu i le lalolagi o matou ola ai. Amene.*

† Mo Mafaufauga Atili: O masani ona tatou faamama’i i o tatou olaga ua tuana’i ma faatapula’a se tuputupu a’e faaletagata lava ia? Ia tatou taliaina o tatou olaga o le taimi nei, ma se vaaiga aga’i a taeao.

## **Aso Toonai, 31 Oketopa.**

Manatu Autu - Toasā o le Tama’i Mamoe.

Tusi Faitau – Fa’aaliga 6: 12 – 17

*“<sup>16</sup>Ua latou fai atu foi i mauga ma papa, Mafuli mai ia ia te i matou, ma tanuma’i i matou ai le silafaga a lē tietie i le nofoālii, ma le toasā o le Tama’i Mamoe; <sup>17</sup>auā ua oo mai le aso tele o lo latou toasā, o ai foi se na te mafai ona tu atu?”*

A o ou ola a’e i lo’u tamaitiiti i Taumarunui i Niu Sila, sa i ai le matou tama’i mamoe fagafao na faaigoa ia Willie. Sa matou tausia Willie ma fau lona potu e nofo ai i le potutālavalava i lo matou fale. Sa matou auaua’i e fafaga Willie i suāsusu mafanafana e fa’aaogā ai se fagususu mata’eta’e e faapipi’i i ai le matāsusu a pepe. O se manu e fiafia tele matou te ta’aalo, ma taumulimuli mai i soo se mea matou te o i ai, i tua o lo matou fale ma faasolo atu i isi fanua, o malae ma faatoaga. Na aveā Willie o se tasi o lo matou aiga ma sa masani ona matou mafuta faatasi i totonu o lo matou fale i luma o le magālafu i le tau mālūlū. O nisi aso e mulimuli mai ai i le solo a tamaiti e alu i le falesā i le lotu i le Aso Sa, e masani ona faate’ia ai o matou matua.

O le Tama’i Mamoe o loo ta’ua i le faitauga o le asō e ese mai le tama’i mamoe na matou tutupu faatasi a’e. O Keriso le Tama’i Mamoe Faa-ositaulaga a le Atua. O le fa’aaliga na molimauina e le aposetolo o Ioane e faasino i le faamaufaailoga lona ono mai le aofa’i e fitu lea na ia vaaia. O le Atua o loo afio i le nofoalii ma Keriso le Tama’i Mamoe Faa-ositaulaga a le Atua o le a faamasinoina le lalolagi i le i’uga. Peitai e i ai le tala fiafia. O i latou uma na sausuina i le toto o le Tamai Mamoe a le Atua, i latou na talia Keriso e aveā ma Faaola, o le a lavea’iina mai le toasā o le Tama’i Mamoe. E pei ona sa faasaoina mai ulumatua a Israelu mai le oti ina ua sausuina pou o faitoto’a o latou fale i le toto o le tama’i mamoe, o le a faapena foi ona lavea’iina i latou uma ua talia Iesu Keriso i le i’uga o le lalolagi.

† *Le Atua e o le alofa tunoa, faafetai mo le faaolataga ua e faia mo i matou e ala i lau meaalofo o Iesu Keriso. Ia matou fiafia i lou alofa tunoa e ala i lo matou faatuatua ia Iesu Keriso, nai lo le fesaga’i ma le toasā o le Tamai Mamoe. Amene.*

† Mo Mafaufauga Atili - O lē fea e te filifilia ina ia e maua i le i’uga: o le toasā o le tama’i mamoe, po o le faaolaina i le toto o Keriso?

**O E UA MANUIA I LE**  
**SU'EGA ULUFALE**  
**KOLISI FA'AFAlFEAU**  
**MALUA 2020**

1. Afaese Falana'i  
    Kuiniselani Saute
2. Alipapa Tuuau Malaga  
    Lotofaga Lepa Aleipata
3. Aperaamo Apelu  
    Falealii Safata Siumu
4. Aukuso Eneli Gasolo  
    Itu o Tane
5. Caesar Utufua                      Apia
6. Frank Faatau  
    Kuiniselani Saute
7. Fale Laban                      Apia Sasa'e
8. Kaleuati Tusi                      Apia Sasa'e
9. Lance Junior Tautiepa  
    Kuiniselani
10. Lualua Manila  
    Apia Sasa'e
11. Makarios Fatu Malaefono  
    Faasaleleaga
12. Makesi Namulauulu  
    Faleata
13. Misioka Nicholas Tanielu  
    Apia Sasa'e
14. Nuutasi Fuiavailili Neria  
    Manukau
15. Peresia Muagututi'a  
    Lotofaga Lepa Aleipata
16. Samuelu John Ah Sam  
    Apia Sasa'e
17. Sebastian Tuifao  
    Kuiniselani
18. Slam Opetaiia Samuelu  
    Aana
19. Spencer Eeseese Leuta  
    Itu o Tane
20. Talia Iati  
    Lotofaga Lepa Aleipata
21. Vagatai Muaau  
    Niu Sila Saute
22. Viliamu Eletise Su'a  
    Apia
23. Vincent Faafo  
    Apia Sasa'e

**O E UA FAI I LAGI**

**LESAPUAVASA**  
**ISAIA**  
**20/9/1933 - 3/4/2020**

O le Tiakono Tama'ita'i, a o le tinā matua o le EFKS Kingsland, Niu Sila. Na soifua mai Lesa Isaia i le aso 20 Setema 1933, ae valaauina e lona Matai i le aso 3 Aperila 2020, a'o feagai le lalolagi ma le fa'ama'i ogaoga o le Koviti-19. Na faaipoipo atu o ia i le tiakono ia Puavasa Talila'i Isaia i le EFKS i Leulumoega-Tuai i le tausaga e 1958. O le tausaga foi lea, na fa'ae'e ai lo lā tofi ti'akono e le toeaina o Lemuelu. E to'afitu le fanau. O fanau a fanau (grand children) e to'alua sefulu tolu. O fanau, a fanau, a fanau (great grand children), e to'alima sefulu tolu. A'o fanau, a fanau, a fanau a fanau (great, great grand children), e to'asefulu. O le aofa'i atoa, o e na tutupu mai i le tina matua, a o soifua, e to'aiva sefulu tolu.

O le tausaga 1981, na malaga mai ai le tinā ma le tiakono mai Samoa, ma galulue i le aulotu i Kingsland. O le tausaga 1997, na tu'umālō ai le tiākono ia Puavasa, ona fa'aaau ai lea e le tinā le tofi tiakono tama'ita'i mai lona tausaga, seia oo ina ua ia lē mafai ona tauaveina nisi o tiute o le galuega, ona ua matua le soifua. O se tinā e fiafia e galue mo lana EFKS. O se tinā e tausii faifeau, ma fiafia e faitaulaga i le Atua. Na maliu le tinā ia Lesa, i le vaitaimi tonu a o feagai Niu Sila, ma le lalolagi, ma tūlāfono o le tapunia o faitoto'a ona o le faama'i o le Koviti-19. O se vaitaimi faigata na tuumalo ai le tina, ona o ia tulafono.

O le Lotu faale-Aiga, na faia i luga o le Upega tafa'ilagi (Facebook) i le afiafi o le Aso Lulu 8/4/2020 i le 7pm. O le aso Tofi, 9 Aperila, 11.00 i le taeao, na fai ai lona toe Sauniga i le Fale Maliu o Lugaliga Funerals i Magele. Na o le to'asefulu matou sa mafai ona 'auai e fa'amavae atu i le tinā matua i lea aso. Sa ou ta'ita'ia le Sauniga mulimuli o le tinā matua. Na mae'a lona Sauniga ona molimoli atu ai lea o lona sã i le fanua-tanu i Mangere mo ona toe Sauniga i lona nofoaga mau, ma matou fa'atōfã atu ai i le tinā i le pese masani a le au Kerisiano, "Talofa Uso e Tofaina oe, ua sau le itūpō e mālōlō; e ala oe pe ā mavae le po, Tōfã...Tōfã.." O upu fa'amalosiau o lenā aso, a le ekalesia, Mataio 26:50a, "O mea uma e lelei, e i ai o latou mutaaga." *All good things come to an end.* So'o se mea ua matagofie, ma lelei i lenei soifuaga, e i ai lava o latou mutaaga. Saafiafiga a le Atamai; "*O ona pō e ataata ai, ma ona pō e tau fai tagi tu'i ai.*" Ia fa'amaise le Agaga o le Atua i alo ma fanau, o aiga na tagi mai ala i lea taimi, ma lana ekalesia. Ia manuia lau malaga Lesa!

*Saunia: Fetuliaina Pama FS EFKS Kingsland, AUKILANI.*

**LOTU TAMAITI 122**

Fono Tele i Malua, ia Me ole 1898 Fai le iugafono ia atofa se Aso Sa Ia faapitoa faapaia ma faamamalu Mo alo ma fanau iti uma a le LMS

Masina Iuni soso'o ai ua amata loa Faatino le taeao fou o le Tala Lelei Aso Sa mulimuli Iuni avea faapitoa Ma Aso Sa o Tamaiti i Samoa nei  
*(faauma itulau 15)*

# O E UA FAI I LAGI FOLAUGA

## LAUANO VAA

26/9/1953-24/7/2020

O le Susuga i le A'oa'o Fesoasoani sa soifua mai i lona aiga i Patamea, Savaii. Na valaauina e lona Matai i lona maota i le pitonuu i Maraenui, Napier i Niu Sila. O lona faletua o Laavasa Lauano, sa galulue ma auauna ma tautuaina le finagalo o le Atua i le ekalesia EFKS i le aai o Napier. O se auauna e atagia i lona soifua lona faamuamua o le Atua, e toaga i sauniga lotu ma lagolago e faamaopoopo le galuega i soo se itutino e le gata o le Aufaipese, Aoga Aso Sa, Autalavou, Mafutaga Tama. Sa ia tauaveina foi le tofi o le Failautusi, sa galue e fai ma faiaoga Aoga Aso Sa ma e fiafia e aoaoina le fanau i le mataupu silisili. O se ta okeni, o le taitai pese, o le taitai asafo, o se tamalii sa tele meaalofa o le Atua sa faamanuiaina ai o ia.

Ua matauina le galue malosi o le Susuga i le A'oa'o i lana galuega fai faatoaga faale-malo i le vave usu i le taeao i le malulu ma le vevela o le tau auā le tausiga o lona aiga ma le ekalesia. E pei ona faamaoni i lana galuega fai faatoaga a e silisili lona malosi i lana auaunaga i le galuega a le Atua. O felaugaiga o le Pulega ma le Matagaluega ma soo se tofi lauga e gasolo mai e vaai lava ma le fiafia e auai e oo lava ina ua vaivai lona tino. O se tamā e tāua ia te ia le galuega a le faifeau mo lona aiga. E fiafia e mafuta ma valaau le faifeau ma lona toalua i faiga lotu e faamanatuina ai o se aso fanau, o aso ua te'a mai o ia mai le falema'i.

E fa'aaloalo i tagata uma, e fai tala mālie, e tusaafia ma toe agamalū ona uiga, a saunoa i sona finagalo fa'aalia e matuā 'ānoa taualoga ma tele sona sao mo ni faaiuga fai a le aulotu e tasi i ai. E tausi faifeau ma fiafia e fai taulaga ma soo se mea e fai. O se tamā e faagaloga tā i le loto faapea mea e fai a lenei ekalesia. Peitai ane, ua matauina o le alofa faamaoni o Lauano Vaa i lona toalua ma lona aiga, ae maise lana fanau ma fanau o fanau e pele tele ia te ia. Ua faatino e Lauano Vaa o se a'oa'oga lelei mo tatou uma, o le alofa e leai sona pa tuaoi.

O ona toe sauniga lotu faale-aiga sa faia lea i le 4pm o le Aso Tofi 30 Iulai 2020 i le malumalu EFKS Napier. Sa ou taitaiina le lotu faale-aiga (family service). O le Susuga ia Sunita Nua (FS) EFKS Hastings na saunia talosaga, o le faitauina o Afioga Paia a le Atua ma le lauga na saunia e le Susuga ia John Ah-Honi (FS) EFKS Akina. Faafetai i le matagofie o molimau o lea afiafi sa feagai ai ma alo ma fanau, o aiganalua o uo foi ma e masani faapea le sui o le ekalesia. O le Aso Faraile 31 Iulai 2020 na faataunuuna ai lona toe sauniga na faia lava i le malumalu EFKS Napier. O le Susuga i le Faifeau Toeaina Aufaga Faafia FT sa taitai i le sauniga. Sa ou faaulufaleina lona sa i totonu o le malumalu. O le failautusi o le Pulega ia Meki Lauvi (FS) na feagai ma le upu faamafanafana. Sa molimau le faletua ia Laavasa i le la'ua mafutaga matagofie, sa ou molimau foi e tusa ai ma lona soifua faale-agaga ma faai'uina ai molimau e le Susuga Faifeau Toeaina ia Aufaga Faafia FT.

O le mae'a o ona toe sauniga na molimoli ai lona sa i lona oliolisaga tumau i le Western Hill Cemetery Napier ma matou faamavae atu ai ia te ia i le pese a le au uso Kerisiano, 'Talofa Uso e, tofaina oe...Tofa'.

*"<sup>13</sup>Amuia ē ua oti, o ē ua oti o i le Alii" Fa'aa.14.*

*Arthur Vaeila Talaga (FS)  
EFKS Napier, NIU SILA  
SAUTE.*

## LOTU TAMAITI 122

Fepuari 1909 usu le Fono i Roma A'oga Aso Sa Faavaomalo e saili Faai'uga- Aso Sa lona 3 Oketopa Fai ma Aso Faavaomalo o Tamaiti

Aso Sa Tamaiti a le LMS ua suia I le Aso Faavaomalo mo le lalolagi E sui aso, ae tumau le loto fiafia Faafetai lou titi faitama ua amanaia

E le'i pine ae faatino e isi foi ituaiga Le Aso Sa taua mo tamaiti Samoa Ua aapa le Malo opogi le tapuaiga Ua le faapito ae mo le atunuu atoa

Mulimuli ane sui ile AsoSa lona 2 Fai ma le aso malolo i le Aso Gafua Lotu Tamaiti ua soo ai le faafanua Na fanau i Malua ua 122 le matua

Faataua fanau, tu'u mai e papatiso A'oa'o le Tusi Paia e ala i Tauloto Lauga, Pese & Viiga, Tala Faatino Tatalo ia masani ai, a'oa'o ia potu

E sisina ofu, 'ula, pale ma ie faitaga Faailoga lea e mamā lotu ma agaga Fiafia e talia ma le faafetai ona la'ei Faatusa i ai le taliaina ole Tala Lelei Manuia auauna a le Atua, faapena outou matua, ae ola fanau soifua.

# O E UA FAI I LAGI FOLAUGA



**LESA PUAVASA ISAIA**



**LAUANO VAA**

**PAPATISOGA & 122 TAUSAGA LOTU TAMAITI**



**AOGAASO SA, AUTALAVOU, EFKS ALEISA SISIFO, FALEATA**

**FAIFEAU FAIA'OGA, A'OA'O MALUA & INISINIA ZOOM FTF 2020**



*(Dr. Alesana F. Pala'amo FS, A'oa'o Malua & Tavita Une (IT Ofisa Tutotonu EFKS))*